

太平經卷之四十五同卷十六

卷六

起上出書訣第六十一

下愚賤生不勝心所欲問犯天師忌諱為過甚劇意所欲言不能自止小人不忍情願五內發煩慙悒請問一大疑唯天師既待以赤子之分必哀原其飢渴汲汲乎行道之何謙哉唯唯今天師乃與皇天后土常合精念其心與天地意深相得比若重規合矩不失毛髮之間也知天地常所憂口口是故下愚不及生冒慚乃敢前具問願得知天地神靈其常所大忌諱者何等也善乎生精益進哉子今且可問正入天地之心意人得知之著賢人之心萬世不復去也吾常樂欲言無可與語今得真人問之心中訣喜且為子具分別道之不敢有可隱匿也所以然者乃恐天地神靈深惡吾則為身大災也真人但安坐明聽天地所大疾苦惡人不順與不孝何謂也願聞之善乎子之難也夫天地中和凡三氣內相與共為一家反共治生共養萬物天者主生稱父地者主養稱母人者主治理之

稱子父當主教化以時節母主隨父所為養之子者生受命於父見養食於母為子乃當敬事其父而愛其母何謂也然父教有度數時節故天因四時而教生養成終始自有時也夫惡人逆之是為不順其父天氣失其政令不得其心天因大惡人生災異以病害其子比若家人父怒治其子也其變即生父子不和恨子不順從嚴父之教令則生陰勝其陽下欺其上多出逆子也臣失其職鬼物大興共病人姦猾居道傍諸陰伏不順之屬欲在逆天地也真人是又可不順乎此乃自然之術比若影之應形與之隨馬不脫也誠之唯唯今謹已敬受師說天之教教稱聞犯地之禁諾真人明聽唯唯天者乃父也地者乃母也父與母俱人也何異乎天亦天地亦天也父與母但以陰陽男女別耳其好惡者同等也天者養人命地者養人形人則大愚較且暗不知重尊其父母常使天地生凡人有人悔悒悒不解也何謂也善哉子之言也深得天地意大災害將斷人必吉善矣何謂

也唯天師分別之然今天下之人皆共賊害冤其父母何謂也四時天氣天所業行也而逆之則賊害其父何謂也今人以地為母得衣食焉不共愛利之反共賊害之何謂也然真人明聽人乃甚無狀共穿鑿地大興起土功不用道理其深者下著黃泉淺者數丈母內獨愁恚諸子大不謹孝常常忿忿悒悒而無從得通其言古者聖人時運未得及其道之遂使人民妄為謂地不疼痛也地內獨疼痛無譬乃上感天而人不得知之愁因其子不能制上愬人於父愬之積久復久積數故父怒不止災變恚萬端並起母復不說常怒不肯力養人民萬物父母俱不喜萬物人民死不用道理欲在此後生所為日劇不得天地意反惡大地言不調又共疾其帝王言不能平其治內反人人自得過於天地而不自知反推其過以責其上故天地不復愛人也視其死亡忽然人雖有疾臨死嗚呼罪名明白天地父母不復救之也乃其罪大深過委頓欲責反在此也其後生動之尤劇乃過前

更相倣效以為常法不復拘制不知復相禁止故災日多誠共寬天地天地人之父母也子反共害其父母而賊傷病之非小罪也故天地最以不孝不順為怨不復赦之也人命短死無數者無可寬也真人豈曉知之邪唯唯今天使子來具問是知吾能言真人不可自易不可不慎也唯唯今人共害其父母逆其政令於真人意寧可久養不邪故天不大矜之也今天師哀愚生為其具說以何知天地常忿忿悒悒而怨惡人數起上乎善哉。○天使子屈折問之足知為天地使子問此也。諾吾甚畏天不敢有可隱恐身得災今且使子昭然知之終古著之曾心不可復忘也今有一家有興功起土數家被其疾或得死亡或致盜賊縣官或致兵革鬪訟或致蛇蜂虎狼惡禽害人大起土有大凶惡小起土有小凶惡是即地忿忿使神靈生此災也故天地多病人此明證也子知之邪唯唯今或有起土反吉無害者何也善哉子之問也皆有害但得良善土者不即病害人耳反多四方得

其凶久久會且害人耳得惡地者不忍人可為即害之也復并害遠方何也是比若良善勝之人也雖見寬能強忍須臾心不忘也後會害之惡人不能忍須臾交行善哉善哉今地身體積巨人比於地積小小所為復小不足道何乃能疾地乎哉善哉子之難也天使子分別不明此以何知之以其言大倦倦子今欲云何心中悒悒欲言乃快天地神精居子腹中敬子趣言子固不自知也凡人所欲為皆天使之諾不敢有可匿也子明德唯唯今子言人小小所動為不能疾地今大人軀長一丈大十圍其齒有齧蟲小小不足道合人齒大疾當作之時其人啼呼交且齒久久為墮落悉盡夫人比於天地大小如此蟲害人也齒尚善金石骨之堅者也夫蟲但肉耳何故反能疾是子人之疾地如此矣子知之邪行真人復更明開耳唯唯夫人或有長出丈身大出十圍疽蟲長不過一寸其身小小積小不足道也居此人皮中且夕鑿之其人病之乃到死亡夫人與地大小比若此矣此蟲

積小何故反賊殺此人乎真人其為愚暗何故大劇也將與俗人相似哉實不及子尚不及何言凡人乎有過有愚唯天師願聞不及業幸為愚生竟說其意諾不匿也吾知天地病之劇故口語子也行復為子說一事使子察察重明知之唯唯今大丈夫力士無不能拘制疥蟲小小不足見也有一斗所共食此人病之疾痛不得卧劇者著牀疥蟲蚤蚤小小積眾多共食人盡蟲者殺人疥蟲蚤同使人煩懣不得安坐皆生瘡湯夫人大小比於地如此矣寧曉解不唯唯行今子或見吾所說如不足以為法也今為子言之人雖小其寬愁地形狀使人昭然自知深有過責立可見也今一大里有百戶有百井一鄉有千戶有千井一縣有萬戶有萬井一郡有十萬戶有十萬井一州有億戶有億井大井一丈中井數尺小井三尺今穿地下著黃泉天下有幾何哉或一家有數井也今但以小井計之十井長三丈百井長三十丈千井三百丈萬井三千丈十萬井三萬丈天下有如此

者凡幾井乎穿地皆下得水水乃地之血脉也今穿子身得其血脉寧疾不邪今是一億井者廣從凡幾何里子自詳計之天下有幾何億井乎哉故人為寃天地已明矣子賊病其母為疾甚劇地氣漏泄其病人大深而人不愛不憐之反自言常寃天地何不純調也此不反邪是尚但記道諸井耳今天下大屋丘陵冢及穿鑿山阜米取金石陶瓦豎柱妄掘鑿溝瀆或閉塞壅闕當通而不得通有幾何乎今是水泉或當流或當通又言閉塞穿鑿之幾何也今水泉當通利之乃宣因天地之利瀆以高就下今或有不然妄鑿地形皆為瘡瘍或有塞絕當通不通王治不和地大病之無肯言其為病疾痛者地之精神上天告愆不通日無止也天地因而俱不說喜是以太和純氣難致也真人寧解不邪唯唯今人生天地之間會當得室廬以自蓋得井飲之云何乎善哉子之言也今天不惡人有室廬也乃其穿鑿地大深皆為瘡瘍或得地骨或得地血何謂也泉者地之血石者地之骨

也良土地之內也洞泉為得血破石為破骨良土深鑿之投瓦石堅木於中為地壯地內獨病之非一人甚劇今當云何乎地者萬物之母也樂愛養之不知其重也比若人有胞中之子守道不妄穿鑿其母毋無病也妄穿鑿其母而往求生其母病之矣人不妄深鑿地但居其上足以自彰隱而已而地不病之大愛人使人吉利今願聞自彰隱多少而可凡動土入地不過三尺提其上何止以三尺為法然一尺者陽所照氣屬天二尺者物所生氣屬中和三尺者屬及地身氣為陰過此而下者傷地形皆為凶古者穴居云何乎同賊地形耳多就依山谷作其巖穴因地中又少木梁柱於地中地中少柱又多倚流水其病地少微故其人少病也後世不知其過多深賊地故多不壽何也此劇病也今時時有近流水而居不鑿井固多病不壽者何也此天地既怒及其比伍更相承負比若一家有過及其兄弟也今人或有不動土有所立但便時就故舍自若有凶何也是者行不利

犯神何神也神非一不可豫名也真人曉邪唯唯是故人居地上不力相教為善故動作過反相及也是者寃今人或大遠流水會當得井水飲之乃活當云何乎善哉子之言也然有故井者宜使因故相與共飲之慎無數易之既易宜填其故塞地氣無使發泄飲地形今地衰不能養物也填塞故去中壯何謂也謂井中瓦石材木也此本無今有比若人身中有奇壯以為病也可恢哉可恢哉卿不及天師詳問之不但知是真人來前唯唯子問事恒常何一究詳也所以詳者比與天師會見言人命在天地天地常悅喜乃理致太平壽為後是以吾居天地之間常駭忿天地故勉勉也天地不和不得竟吾年善哉子之言也吾所以常恐駭者見天地毒氣積衆多賊殺不絕帝王愁苦其治不平常助其憂之子何豫助王者憂是乎吾聞積功於人來報於天是以吾常樂稱天心也善哉子意今天師既開通惠生示以天忌願復乞問一疑事今河海下田作室廬或無柱梁入地法三尺

輒得水當云何哉善乎子之問也此同為害耳宜復淺之此者地之薄皮也近地經脉子欲知其效比若人有厚皮難得血血出亦為傷矣薄皮者易得血血出亦為傷俱害也故夫血者天地之重信效也夫傷人者不復道其皮厚與薄也見血為罪名明白夫人象天地不欲見傷傷之則怒地何獨欲樂見傷哉夫天地乃人之真本陰陽之父母也子何從當得傷其父母乎真人宜深念是於赤心惡人或輕易忽然不知是為大過也今子當得飲食於母故人穿井而飲之有何劇過哉子言已失天心明矣令人飲其母乃就其出泉之處故人乳人之泉圻也所以飲子處比若地有水泉可飲人也今豈可無故穿鑿其皮膚而飲其血汁邪真人難問甚無意愚生有過觸天師忌諱不謙也然難問不極亦不得道至訣也不惡子言也此必皇天大疾乃使子來口口問是此故子言屈折不止也今唯天師原之除其過愚生欲言不能自禁止平

行何所謙子既勞為天地遠來問慎無閉絕吾書文也唯唯凡人不見觀此書不自知罪過重反獨常共過罪天地何不和也治何一惡不平也不知人人有過於天地前後相承負後生者得并災到無復天命死生無期度也真人努力無滅去此文天地且非怒人唯唯真人被其謫罰則凶矣唯唯書以付歸有德之君宜以示凡人乃天地之子萬物之長也今為子道當奈何乎俱各自深思從今以往欲樂富壽而無有病者思此書言著之宵心各為身計真人無匿也傳以相告語令天地之神乃隨其書而行察視人言何也真人知之邪今以何知其隨人而行以吾言不信也子誠絕匿此書即有病有敢絕者即不吉是即天地神隨視人之明證也可畏哉唯唯行去自勵自勵夫人命乃在天地欲安者乃當先安其天地然後可得長安也今乃反愁天地共賊害其父母以何為而得安吉乎哉前後為是積久故災變不絕也吾語不誤也吾常見地神上自訟未嘗絕也是故誠知其口口見真人比如丁寧問之即知為天使

真人來問是天欲一發覺此事令使人自知百姓適知責天不知深自責也今天何故一時使吾問是乎所以使子問是者天上皇太平氣且至治當太平恐愚民人犯天地忌諱不止共亂正氣使為凶害如是則太平氣不得時和故使子問之也欲樂民不復犯之則天地無病而愛人使五穀萬物善以養之也如忽之忿不愛人不肯養之也故將凶歲者無善物將興歲其物善此之謂也真人知之邪善哉善哉古者同當太平何不禁人民動土地哉善乎子之問事也天地初起未嘗有今也以何明之今者天都舉故乃錄委氣之人神人真人仙人道人聖人賢人皆當出輔德君治故為未嘗有也初陰陽開闢以來錄天民仕之未嘗有此也故為最大也可駭哉可駭哉是故都出第一之道教天下人為善之法也人善即其治安君王樂遊無憂善哉善哉樂乎樂乎是故教真人急出此書慎無藏匿以示凡民百姓見禁且自息如不止禍及後世不復救得罪於天地無可禱也真人

寧知之邪唯唯行去書中有所疑乎來問之唯唯

右解天地寬結

太平經卷之四十五

太平經卷之四十六

道無價却夷狄法第六十二

天師將去無有還期願復乞問一兩結疑行今疾言之吾發已有日矣所問何等事也願乞問明師前所賜弟子道書欲言其不謙大不事今不問入猶終古不知之乎行勿諱今唯明師開示下愚弟子諾今師前後所與弟子道書其價直多少噫子愚亦大甚哉迺謂吾道有平耶諾為子具說之使子覺悟深知天道輕重價直多少然今且賜子千斤之金使子以與國家亦寧能得天地之歡心以調陰陽使災異盡除人君帝王考壽治致上平耶今齋萬雙之璧玉以歸國家實而藏之此天下之珍物也亦寧能使六方太和之氣盡見瑞應悉出夷狄却去萬里不為害耶今吾所與子道畢具迺能使帝王深得天地之歡心天下之羣臣徧說踐行動搖之屬莫不忻喜夷狄却降瑞應悉出災害畢除國家延命人民老壽審能好善業行吾書唯思得其要意莫不響應比若重規合矩無有脫者也成

事大口口吾為天談不歡子也今以此天法奉助有德帝王使其無憂但日遊其價直多少哉子之愚心解未乎哉諾復為子陳一事也天下之人好善而悅人者莫善於好女也得之迺與其共生子合為一心誠好善可愛無復雙也今以萬人賜國家莫不悅且喜見之者使人身不知其老也亦寧能安天地得萬國之歡心令使八遠響應天下太平耶哉吾道乃能上安無極之天下能順理無極之地八方莫不悅樂來降服擾擾之屬者莫不被其德化得其所者也是價直多少子自深計其意子欲樂報天重功得天心者疾以吾書報之如以奇偽珍物累積之上柱天天不為其說喜也不得天之至心也欲得天心乃宜旦夕思吾書言已得其意即亦得天心矣其價直多少乎故賜國家千金不若與其一要言可以治者也與國家萬雙璧玉不若進二大賢也夫要言大賢珍道乃能使帝王安枕而治大樂而致太平除去災變安天下此致大賢要言奇道價直多少乎哉故古者聖

卷六

十二